

Mbanjgimcuk: Aen Mbanjcuengh Gaeuq-geq Sengcingz Seuqcingh Lwenqda Ndeu

整洁悦目的原生态村寨——金竹壮寨

□Hingz Geiq ingj

Daj gizgyae yawj aenmbanj gyaunde.

Youq gwnz roen bae Naz-mbaeklae Lungzci, yaekaeu gvaq Mbanjgimcuk, cijraen henz dourin bakmbanj miz gep baiz sij miz dieg goepingj 《Mbeiguk Yinghyungz》nde, couh swnh gij roenlingq benjrin bin doxhwnj, byaij haeu dourin hung le, couh yawjraen benq “ranzlae” miz hauj lai aen ranzcanx faex doxdaeb doxdep baiz baenz ndeu. Roenbenjrin ngaenzgeb baenz gep baenz gep iet coh ndaw mbanj swnj daengz gak ranz, ranzcanx ciengzfaex bambenj vaxheu aen daep aen, gij suenbyaek aeu led humx haenx byaek heu va hom, gyoengq vunzmbanj ndangdaenj Bouxcuengh gyaunde yienhda, yiengh mbanj gaeuqgeq sengcingz youh seuqcingh caezcingj. Daengx mbanj miz gij swhyenz gingjvahn vwnzva lai cungj lai yiengh, ranzcanx, ndangdaenj, ngoenzciet, faexcuk, nazmbaeklae daengj, yiengh gaeuqgeq de louzce ndaej caezcienz, fungsug fungcingz daegsaek yienhda, 1992 nienz ndaej Lenzhozgoz Gyaugohvwnz Cujciz soengq hawj mingzdaeuz ndei “Yienghndei Mbanjcuengh”, 2007 nienz ndaej Cungguk Gozduj Ginghci Yozvei bingz baenz Cungguk buek daih’ it “aenmbanj gingj ndei Cungguk”.

Mbanjgimcuk dieg youq Gveilinz Si Lungzswng Gak Cuz Swciyen Hozbingz Yangh Ginhyangh Cunh, liz yienhsingz coh baihdongnamz 20

goengleix gyae, dwg aen Mbanjcuengh daeuz haeu Ginggih Naz-mbaeklae Lungzci, baiz youq daih’ it 13 aen mbanj rangh Lungzci. Aenmbanj youq Cuihmingz satbyai Cuihcingh codaeuz hwnjguh, ing bya dep raemx daeb hwnj gwnz bodat Byagimcuk, ranzcanx aeu faex benj doqbaenz, gvangq rongh hawqsauj, aen daeb aen baiz doxhwnj gig ndei yawj, funggek daegbied; Dahgim yaeng’ yaeng lae gvaq najmbanj, mbiengj gvaz ndoeng faexsamoeg, mbiengj swix ndoeng faexcuk, miz 154 ranz 700 lai vunz Bouxcuengh daihdaih comzyouq, dwg aen Mbanjcuengh denjhingz ndeu; go faexsamoeg geq ndaej 300 lai bi ndeu daengj ndwn youq gyang mbanj, gwnz ganjfaex venj aen siengqdeu “Moz Yiz daihvuengz” (boux yinghyungz gojriuz ndawbiengz Bouxcuengh) ndeu, lumj goengbaed hensouj nei hensouj gizneix, caeuq doumbanj gaeuqgeq, aen cingjraemx gaeuqgeq doenghgij rizgeq neix caemhcaez lwnhgangj gij lizsij gyaenanz aen Mbanjcuengh neix.

Ndwn youq ndaw Mbanjgimcuk, ndaej yawjraen gij nazmbaeklae gwnz Byagimcuk doiqnaj mbanj hung-gvangq gyaunde, sienqdiuz utgoz loq nduen, youh fwtsohswd bongh mad baenaj, sangiswt soengsat, gaiq daeb gaiq lienz baenz benq, ndei yawj dangqmaz; benq ndoeng faexcuk gwnz

dingjbya henz mbanj gvangq baenz fanh lai bingzfanghmij, cungj dwg go’ndok gofaiz, saekgim yinx vunz, rumz baez ci daeuj, baenz benq ndoengfaex yiengjsasa, byaifaex bibuengq baiqyedyed, hawj vunz yawj dwk maezmwd. Hekyouz byaij haeu ndaw mbanj, bin hwnj ranzcanx, couh ndaej cimz gwn gij “caz Lungzci” Cuihcingh cijdan soengq hawj ranz-vunz vuengzdaeq gwn haenx caeuq laeujhaux aeu raemx Lungzci siungauz ndaej vunz guekrog haenx dwg “raemxfangz baihdong” haenx; hauxnaengj haj saek, gaeqnaengj mbokcuk, ngaiz mbokcuk doengh gijgwn Bouxcuengh neix feihhom biuhop, vanj, deb, cenj, dawh, beuzgeng faexcuk yiengh “doj” naekgywg. Youq ndaw mbanj, mwngz vanzlij ndaej yawj “fouxdwklongj” “fouxvunjhaz” “fouxgoengsae” “foux-daengqlungz” “fouxlwgyoh” “fouxmbokcuk” doenghgij foux ndawbiengz Bouxcuengh sengcingz sohseid haenx, lij ndaej yawjraen “yizsi coux bawxmoq” daegbied haenx, bae camgya guh’ angq “dwkdomq” miz-yinx, bae humx dingq gij Fwenguengh ndei dingq haenx, yiengjsouh gij fungcingz Bouxcuengh gaeuqgeq sengcingz de, youq ndaw angqyangz ndaw mbouj sij ndaej haenx bae bin yawj nazmbaeklae, louz roengz faenh najriu soengset ndeu, daiq bae faenh vwnzva minzcuз naekgywg ndeu.



▲ Yienj foux ndawbiengz Bouxcuengh hawj hekyouz yawj.



▲ Diuq fouxsaux coux hek.



▲ Bakdouhung aenmbanj hungsang bw.



▲ Vunzmbanj moix ngoenz cungj bin roenbenjrin ma ranz.



◀ Gepbaiz mingzdaeuz ndei ma daengz ndaw mbanj.



◀ Lwgsau daep mauhnggeq diuq fouxvunjhaz hoh maj baenz vunz.

▲ Giuzva vang gvaq Dahgim cieq seiq baih.